

Payí Poro Taitaso nání eañinarini.

Payí rina Taitaso nání Poro eañinarini. Taitaso Judayí womani. Émáýí worini. Poro émáýí añíyo xwiýá yayí winipaxípi wáí urimearíná arfá niwiri Jisasomi diñí wikwíroñorini. Poro tñi nawíni emegíí worini (Wáí wurimeiarigíáwa 15:2, 2 Korini 7:6-7, 8:6,16). Jisasoyá siyikí imónigíá piriñwí yoí Kiritiyi riniñípimi ñweagíáyo umeñweáwiniginiri urípeañorini. O e niñweari umeñweañáná Poro wí e dání “Numeñwearíná e epaxí e epaxí tiyí rimónini?” yaiwíwiniginiri payí rina neari wiowáriniginini.

1 ¹ Poroni —Nioni Gorixoyá xináíníniñí nimóniri omiñí wiariñá wonirini. Jisasi Kiraisoyá wáí wurimeiaríñá wonirini. Ayí Gorixo ámá nioniyá oimónípayiniri íá yiyamiximí yagíyí xíomi diñí wikwíroro xwiýá nepaxiñí imóniñípi —Api ámá Gorixomi pírániñí nixídiróná epaxípi nánipirini. Api nání xixeni niñíá imóniro epírfa nání wáí wurimeiaríñá wonirini. ²⁻³ Nioni diñí re niyaiwiri wikwímoñini, “Ámá Gorixomi diñí wikwíroarigíáýí wí maníní aniñí ñweapírfa nání diñí niyimiñí sixí umímoníárini.” niyaiwiri niwikwímoríná wáí wurimeiaríñá wonirini. Diñí niyimiñí api, ayí Gorixo —O yapí wí ripaxomani. O amipí wí sini mimixáriñími dání re ráriñípirini, “Diñí nikwíropíríáýí diñí niyimiñí tígíáýí imónipíríárini.” ráriñípirini. Xewaníño ráriñíná imónáná ámá xwiýá xíoyá wáí urírixiniri nuowárenapiriñípimi dání xwiýá api siñáni wía óniñíri. Xwiýá api Gorixo —O yeáyí neayimixemeañorini. O nioni xwiýá api ámáyo wáí urimemía nání “Api Poromi íániñí wiepíxíniasíimigini.” ráriñíri. ⁴ Nioni Taitasoxi —Joxi diñí nene ikwíroñwápa ikwíroñoxi eñagi nání gí niaíwíniñí imóniñoxirini. Joxi nání payí rina neari mónapariñini. Negí ápo Gorixo tñi Kiraisi Jisaso —O nene yeáyí neayimixemeaníorini. O tñi awaú wá riwianiri joxi niwayíroniri ñweari nání simixiri oépiyi.

Ámá Jisasoyá siyikí imónigíáyo wipenweapaxíimónipíríáwa nánirini.

⁵ Ayí joxi ripi éwiniginiri piriñwí yoí Kiritiyi riniñípimi riwáriñárinini. Nioni sini pírániñí wé miroáríapi joxi wé roáririni nioni riráriñápa añí

gipi gipi Jisasoyá siyikí imónigiááyí ŋweagiápimi áamá wí wipenweapíría nání urípeari éwiniginiri e riwárináriní. ⁶Áamá wo nání “Ómi orípeámini.” niyaiwiríná “Apí apí e imóniŋoríani?” niyaiwiri siŋwí winaxídfírixiní. Áamá wí xwiýíá mumeáripaxo eŋagi siŋwí winiri apixí ná wíni meŋo eŋagi winiri xegí niaíwí Jisasomi diŋí wikwíroro áamá wí xwiýíá re umeáripaxí mimónipa ero, “Ayí rikikírío nero aríkwíkwí yarigiááyírini.” umeáripaxí mimónipa ero eŋagía siŋwí winiri nerínáyí, ananí rípeáirixiní. ⁷Taitasoxini, ayí ripi nání rirariní. Áamá Jisasoyá siyikí imónigiááyo wipenweagiáwa Gorixoyá bosiwowániŋí nimóniro umeiarigiáwa eŋagi nání áamá wí awami xwiýíá mumeáripaxí imónifírixiní. Ayí wigi diŋí tñini mixídinipa ero aŋíni wikí ría ápiáwíniŋí miwónipa ero iniŋí papikí yarigiápi nání símí mixeadípénipa ero mixí mípepa ero “Amipí apí nioni meapaxírini.” niyaiwiro íwí urápaniro nání mepa ero éfirixiní. ⁸Apí apí e mepa neróná áamá aŋí midáŋíyo aiwá míraŋí ero áamáyo naŋí imóniŋipi owiianeyiniro íkniŋí sipí wiro diŋí íá xirigiááyí nimóniri ero xixeni imóniŋípini ero siyikwí mínigiááyí imóniro nipíreániri ero éfirixiní. ⁹Áamá xwiýíá eŋwipéniŋí imóniŋípimi píri rakímí yarigiááyo apimi dání eŋí rirémixí wiri wigi diŋíyo dání rarigiáapimi xopírírí wiri epaxí imónipíría nání xwiýíá diŋí ŋwiráripaxí none áamáyo uréwapiyariŋwápi tñi xixeni imóniŋipi ení xaíwí íá xirífirixiní.

Mimóni uréwapiyarigiááyí nánirini.

¹⁰Ayí ripi nání “Áamá apí apí imónigiááyoni urípeáirixiní.” rirariní. Áamá “Jisasoyá siyikí imónigiááyo uréwapiyariŋá woni imóníimigini.” yaiwinarigiááyí obaxí ayí waumíní ero surímá xwiýíá riŋwaniri áamáyo yapí wíwapiyaniro uriro yarigiááyírini. Áamá e yarigiááyí obaxí re rarigiááyírini, “ ‘Gorixomi píraníŋí ouxidimini.’ niwimóniríná Jisasomi diŋí niwikwírori aí iyí símí sío niwákwíniríná ayí aŋipaxí epaxírini.” rarigiááyírini. ¹¹Ayí wayá amipí íwí ourápaneyiniro muréwapiyapaxí imóniŋipi uréwapiyarigiáapimi dání áamá wíyíyá síwí niaíwí aí tñi rixa ayagwí ayónarigía eŋagi nání wigi uréwapiyarigiáapi xe uréwapiyipoyiniri siŋwí miwinipaxí imóniŋwini. Sa píroáripaxí imóniŋwini. ¹²Eŋíná wiwaníŋíyíyá Kiritiyí wo —O wigíyí diŋí émí saímí moŋíyí worini. O re niriri eaŋírini, “Kiritiyí aniŋí yapí rimearigiááyírini. Síwí sayíniŋí imónigiááyírini. Aiwá ímí tñi niro ríwí siwía yiro yarigiááyírini.” ¹³E niriri eaŋípi nepa rinini. Ayináni mimóni uréwapiyarigiááyo mixí ría tñí aría óíyo dání urífirixiní. Ayí Jisasomi diŋí niwikwíroríná samíŋí wegíapi eŋí sixí eámixiniro ¹⁴Judayíyá piyíŋí ikayíwípi nání aría ókiari mimónipa ero áamá xwiýíá nepaxíŋí imóniŋipi ríwímíni mamogíáyí sekaxí rarigiáapi aría miwipa ero epíri nání mixí ría tñí urífirixiní. ¹⁵Áamá íkwirániŋí imónigiááyí amipí apia níni nání “Wé síá neayikínipaxímani.” yaiwiarigiáárini. E yaiwiaríagía aí áamá íkwirániŋí nimóniro Jisasomi diŋí

miwikwiropa yarigiáyí amipí apia níní nání “Wé síá neayikínipaxírini.” yaiwiarigiárini. Wigí diñí sipíwí imóniri eri diñí niyaikiroríná “Apí piaxí eánipaxírani? Meánipaxírani?” moarigiápi síá uyikíniri eri enjagi nání e yaiwiarigiárini. ¹⁶Ayí manjípami dánini waropárfi niniróná re rarigiárini, “Nene Gorixo nání diñí moŋwaénerini.” niriro aiwi wigí yarigiápimi dání waropárfi réniñí inarigiárini, “O nání wí diñí moŋwaénemani.” rarigiárini. Wigí yarigiápi nání Gorixo xwiríá winiri omi arikwíkwí wiro nañí imóniñyí bi epaxí mimónipa ero enjagi nání rariñini.

Ámá ríá rigíáwa nánirini.

2 ¹Ayí e yariŋagía aí jiwaniŋoxi nuréwapiyiríná xwiýá enjwipéniñí imóniñipi tñi xixeni urfirixini. ²E neríná ámá ríá rigíáwami re urfirixini, “Nipikwini mimóniñí imóniñipi diñí mikikayopa ero ámináowa yapini pákíní imóniro diñí nañí íá xiriro époyi. Jisasomi diñí niwikwíroróná samini miwepa ero ámayo diñí sipí wiro wí sipí seaikáraná xwámámí wiro neróná samini miwé époyi.” urfirixini.

Apixíwa nánirini.

³Apianjwami eni re urfirixini, “Pí pí neróná siyikwí mínigífwayíne nimónimáná ero sipí owímeaniri xwiýá mimayíó miropa ero iniigi papikí yarigiápi nání miñí minipa ero apiyá imónigífwami nañí imóniñipi nání wíwapiyiro époyi.” urfirixini. ⁴“Apiyá imónigífwami wigí oxowami tñi niafwíyo tñi diñí sixí nuyiríná wiipaxípi nání wíwapiyiro ⁵diñí nañí íá xiripíri nání wíwapiyiro íkwiráfnániñí imónigíáyí imónipíri nání wíwapiyiro omiseáyíwa oimónipoyiniri wíwapiyiro wá niwuniri arirá wipíri nání wíwapiyiro wigí oxowami pirániñí yeáyí wurinipíri nání wíwapiyiro éfirixini. Ámá wí apiyá imónigífwami e mepa yariŋagía niwiniríná xwiýá Gorixoyápi nání ‘Sipírini.’ ripírinxiniri api api epíri nání wíwapiyípoyi.” urfirixini.

Íwí Sikiŋowa nánirini.

⁶Íwí sikiŋowa eni pí pí neríná diñí nañí íá nixiriro epíri nání enjí rirémixí wírixini. ⁷Joxi pí pí neríná dixí nañí yariñipi tñi íwí sikiñí imónigíáwami siñwepigí wírixini. Nuréwapiyiríná nañí imóniñí bi tñi sipí imóniñí bi tñi gwí nimori muréwapiyipa eri ámináowa yapí pákíní nimóniri eri ⁸xwiýá enjwipéniñipi —Apí ámá wí “Sipírini.” ripaxí mimóniñipirini. Api uréwapiyiri éfirixini. Joxi tñi xewixewí rónigíáyí ayá winiri nene nání xwiýá sipí bi miripaxí imóniro epíria nání api “E éfirixini.” rirariñini.

Xináwániñí nimóniro omiñí wiiarigiáyí nánirini.

⁹Xináwániñí nimóniro omiñí wiiarigiáyo enjí rirémixí re wírixini, “Segí bosowami simaŋwíyóniñí wuríniro yayí winipaxípi wiuro

xixewiámí wí muripa ero ¹⁰wigí amipí wí éí mimínipa ero diñí seañwiráripaxí imóniñipi wíwapiyiro époyi.” urírixini. Xináiwániñí nimóniro omiñí wiiarigiáyí pí pí neróná api api e nixídirinípimi dáni xwiýá Gorixoyá —O yeáyí neayimixemeaariñorini. Xwiýá oyápipimi okiyíániñí yaroaríná ámá “Xwiýá api sipímani.” yaiwipíría náni api “E urírixini.” rirariñini.

“Gorixo wá neawianariño enjagi náni rixa siñáni piaumimí inini.” uriní nánirini.

¹¹Ayí ripi náni “Jisasomi diñí wikwírogiáyí api api érixini.” rirariñini. Gorixo wá nineawianiri “Wiíimigini.” yaiwiáragípi Jisaso niweapiriñipimi dáni ámá niyoni rixa siñáni piaumimí winiñirini. O ámá niyoni yeáyí uyimixemeámániri náni enjipi siñáni piaumimí iniñirini. ¹²⁻¹³Ayí nene sini xwiá tfo niñwearane yayí neaininiápi náni diñí wikwímoariñwápi náni weniñí neri niñwearanéná Gorixo re yaiwiani náni xegí wá neawianinípi wía neaókmixiníñirini, “Gorixo nene ámá omi ríwí riwámimi nimamoríná yarigiápi píni wiárirane ámá omi mixídarigiáyí miñí winariñipi píni wiárirane nerane diñí tñi erane wé róniñí erane Gorixomi pírániñí nixídiríná epaxípi erane yaníwá náni rineafwapiyarini?” yaiwiani náni xegí wá neawianinípi wía neaókmixiníñirini. Yayí neaininiápi náni diñí wikwímoariñwápi, ayí Jisasi Kiraiso —O negí Ŋwía seáyí e imóniñorini. Nene yeáyí neayimixemeaariñorini. Yayí neaininiápi náni diñí wikwímoariñwápi, ayí o wía sogwíniñí píripirí yariñipi tñi siñáni nimónimi weapiniápirini. ¹⁴O negí rikikiríó yariñwápi nipimimi dáni gwíniñí neaíkwewáriri ámá nioniyáyíni nimóniro imiriñí mé nañini oépoyiniri igíániñí neaeámori éimiginiri xewaniño xe onipikípoyiniri siñwí winiñiniginí.

¹⁵Íníná nioni rirariñá ripi dixí tñí e ñweagiáyo uriri oxidípoyiniri enjí rirémixí wiri ámá xwiýá ripi tñi xixeni miyarigiáyo mixí uriri érixini. E neríná ámá wo nioni xe paimimí oniniri siñwí miwinipa neri néní tñoxi nimóniriñipimi dáni érixini.

“Xámi yagwápi mé wé róniñí imóniñipini éwanigini.” uriní nánirini.

3 ¹Joxi ámá Jisasomi diñí wikwíroarigiá joxi tñí e ñweagiáyo re nuriri dirirí wiyáirixini, “Gapímaníyorani, néní tǵíáyorani, simañwíyóniñí yeáyí wuríniro aría yímiǵí wiro époyi. Pí pí imiriñí mimóniñipi epíri náni ipimónipoyi. ²Ámá wíyo xwiýápai miñwiráripa ero wikí tñi xwiýá rarigiáyíné mimónipa ero époyi. Awayini saminí imóniro ámá niyoni wé íkwianwíyo umero époyi.” nuriri dirirí wiyáirixini. ³Ayí ripi náni rirariñini. Nene eni enjíná diñí nañí bi mimó majía ikárinagwaénerini. Mañí wiaíkiagwaénerini. Yapí éwapínagwaénerini. Íeapá neainariñí xixegíni imóniñipini erane miñí

neainariŋí xixegíni imóniŋípini erane yani náni gwíniŋí neayagenerini. E néra nuranéná á máyo sipí wikáraní náni imónirane sipí diŋí wiaiwirane símí t́ni oneaípoyiniri wíwapiyirane newaniŋene eni símí t́ni inirane yagwaénerini. ⁴Nene e imónagwaéne aiwi Gorixo —O nene yeáyí neayimixemeaariŋorini. O á má náni náni wá wuniri wá wianiri yariŋo eŋagi náni wía nineaókimixiríná ⁵nene yeáyí neayimixemeaariŋini. Imiriŋí mimóniŋí newaniŋene wé nirónirane yariŋwápi náni diŋí nimori náni yeáyí neayimixemeaariŋimani. Xewaniŋo wá nineawianiri náni yeáyí neayimixemeaariŋini. Ayí íwí nene yariŋwápi yokwarimí nineaiiríná xíoyá kwíyípmi dáni —Api igíániŋí neaeámoariŋípimi dáni á má ámi siŋí imóniŋwaéne neaweari diŋí niyimiŋí t́ŋwaéne neaimixiri eŋípirini. Apimi dáni yeáyí neayimixemeaariŋini. ⁶Api nineaiapiríná sipíí mineaí Jisasi Kiraiso, negí yeáyí neayimixemeaariŋo neaiiŋípimi dáni ayá wí neawírnapiyiŋirini. ⁷Ayí o wá nineawianiriŋípimi dáni “Wé rónigíáyirini.” ráriŋene imónirane diŋí niyimiŋí imóniŋí nene e oimónaneyiniri diŋí ikwímoariŋwápi t́ŋwaéne imónirane yaníwá náni kwíyípi neawírnapiyiŋirini.

⁸Xwiyá api, ayí nepa á má diŋí ŋwiráripaxí imóniŋípirini. Ayináni api náni nuriríná samíŋí nimónimáná murí eŋí neánimáná urírixini. Á má Gorixomi diŋí wikwíroarigíáyí pírániŋí nero imiriŋí mimóniŋípi —Api naŋí imóniŋagi náni á máyo sa naŋíni wiipaxípirini. Api arige neri yaníwárfaniri símí xeadípenipíría náni e urírixini. ⁹E neri aí á má majimajía nikáriniro xwiyá miximixeawiámí inarigíapi rariŋagía niwinirínáraní, aríowa eŋíná dáni wigí niaíwí nemeága nuro yoí wírígíapi náni rariŋagía niwinirínáraní, ŋwí ikaxí eániŋípi náni xwiyá ximiximí niniro rariŋagía niwinirínáraní, ayí t́ni wí nikumixiniri miripani. Xwiyá ayí rariŋíapi naŋí imóniŋípimi xídani náni neaiipaxí mimóniŋagi náni rariŋini. Sa miponiŋí xwiyá eŋagi náni rariŋini.

¹⁰Á má giyí giyí Jisasiyá siyikí imónigíáyo xewixewí oimónípoyiniri wíwapiyariŋagía niwiniríná erirí biaú wíagi aiwi aríkí yariŋagía niwiniríná ríwí umóirixini. ¹¹Joxi nijíarini. Á má e yariŋíáyí wigí diŋí síá niyimixiniro íwí néra warigíápmi dáni xwiyá meárinarigíá eŋagi náni rariŋini.

Yayí niwiowáriríná uríŋipi nánirini.

¹²Nioni rixa diŋí neyíróniri “Ríwipi yariŋíná aŋí rixa Nikoporisiyi riŋípimi ŋweáimigini.” yaiwiáriŋá eŋagi náni nioni Atemasomirani, Tikikasomirani, joxi t́ŋí e náni nuowárirínáyí, joxi eŋí neániri nibiri aŋí apimi nímeáirixini. ¹³Sinaso —O xwirixí wienjwpeiariŋí worini. O t́ni Aporoso t́ni egí aŋí nuríná amipí wí náni d́wí mikeamónipa eri óí e diŋí sixí níga uri episíí náni “Bi wiowárimigini.” niyaiwiri aniŋí miní éirixini. ¹⁴Negí imónigíáyí íkíá ná miweariŋíniŋí mimónipa ero Gorixomi

píráníjǐ nixídiróná imiríjǐ mimóníjǐpǐ epíría nání ayí eni áamá díwǐ ikeamónígíáyo arirá wipaxípǐ éwapíníírixini.

¹⁵Nioni tíni re ηweagíáyǐ nínǐ yayí siowárenaparíjwini. Áamá nene Gorixomi díjǐ wikwíroaríjagwǐ nání díjǐ sixí neayarígíáyo “Poro yayí neawárenaparini.” uríírixini. “Seyíné niyínéni Gorixo wá seawianíwinígini.” nimónarini.